

## **Seminar regional „Fundari organ coordinativ a mrejljei a organizatsiilor armăneshtsă niguvernali tu Republica Machidunia”**

Seminarlu cu temă „Fundari organ coordinativ a mrejljei a organizatsiilor armăneshtsă niguvernali tu Republica Machidunia” s-tsănu Bituli pi 25 shi 26 di yismaciunj anlu 2009.

La seminarlu era reprezentantsă di 28 di sutsăts armăneshtsă di Machidunii, reprezentantu di la Birolu ti developari shi niintari a educatsiiljei a limbilor a comunitătslor di la Ministeriatlu ti educatsii shi shtintsă, reprezentantu di la Birolu ti afirmari shi niintari a culturăljei a bănătorlor a comunitătslor di RM di la Ministeriatlu ti cultură, cum shi echipa a Redactsiiljei armănească di la TVM.

Participantsălj lu-apruchearea documentul „Strateghii ti limba shi cultura a Armănjlor di RM” cu adăvdzeari tu sfera a developariiljei organizatsionă shi developarea institunatsională a sutsătslor a comunitatiljei armănească.

La seminarlu era aleptu organ coordinativ a mrejljei a organizatsiilor armăneshtsă niguvernali iu va s-funtsioneadză ica lucreadză trei grupi operativi: ti educatsii/limbă, ti cultură shi ti developari organizatsionă shi ânsănătusheari institutsională.

Ti membri a organlui coordinativ suntu aleptsă: Maria Nicolova di la Ministeriatlu ti educatsii ali RM, Agapi Ciuncovsca di la organizatsia „Nicola Batsaria” di Crushuva, Maria Paligora di la „Comuna Fratslji Manachea” di Bituli, Costa Galimanoschi di la „Iancitsa” di Chicea, Goran Costov di la Unia ti cultură a Armănjlor dit Machidunii, Naco Nicolovschi di la „Halcia al Brova” di Cumanuva shi Daniela Ghiorghieva di la Consiliulu a tinirlor Armănj dit Machidunii.

Tuts oaspits cu harau u-aprucheară adrarea a mrejljei shi a organlui coordinativ tu cursu ti adunari tu un loc a sutsătslor armăneshtsă. Elj actsentară ca ândridzarea alishteii strateghii shi a ljei realizari easti di mari interes a comunitatiljei armănească tsi băneadză tu Machidunii. Propunirea ti verzia alishteii strateghii era ândreaptă la protlu seminar ti sutsătsli armăneshtsă cari s-tsănu ân cadur a proectului tu meslu brumar anlu 2008.

Ân cap a seminarlui, cari era organizat di Fondatsia Institut dishcljjsă sotsietati – Machidunii dadun cu sutsata „Valoari deadun” di Scopia, era Mario Veljcovici.